

Pre Checo Placerean: l’om, l’autonomist, il predi

O pensi che dopo il splendit libri di Antoni Beline: “pre Checo Placerean, Notis par une biografie, Arz Grafichis Furlanis, 1997” e dut ce che su la Patrie dal Friûl, intes cunvignis dal Comun di Montenars e in articui di gjornâi al è stât scrit, si puedi cun facilitât cjatâ une miniere di notiziis par cognossi la vite di pre Checo. Duncje nol è motîf di ripeti culî ce che altris cun competence e passion a àn za scrit.

Mi plasarès invezit dî une peraule no tant fasint un ritrat dal om, autonomist e predi dai siei timps (30.11.1920 – 18.11.1986) ma pluitost, vintlu cognossût, presentant une semençute di un pre Checo predi autonomist e om in chest 2008.

La propueste no je fûr di puest parcè che in vincjedoi agns ancje il Friûl al è cambiât: un mont tecnologjic, globalizât, multimedial si è imponût e o vivin une realtât ch’e cambie in continuazion e ch’e je ormai lontane agns-lûs dai timps di pre Checo.

A chest gno tentatîf di ri-presentazion o scuën poni doi limits.

Prin: propit parcè che o soi predi di paîs, i miei vôi no viodin il pre Checo dai libris ma chel ch’al cjamine pes stradis de nestre tiere;

secont: in cheste imprese o scuën lavorâ alc di fantasie, quasi inmagginant un pre Checo vuê. No dîs che le indovinarai dal dut, o cîr dome di capî vuê l’om di une volte par tignîmi dongje di un tâl mestri e di une grande guide, di une persone che mi à judât intai agns de zoventût e ch’e pues inluminâmi orepresint.

Intal fâ rivivi pre Checo, o cjaparès il percors contrari al titul che mi è stât dât e o metarès: un predi, un autonomist e un om. Chest, sedi parcè che intal incuintrâsi o scuintrâsi cun pre Checo, lui al jere predi, originâl trop che si vûl, ma simpri predi, e sedi parcè che intal passâ dal timp ducj nô, se o vin la fortune di lâ indenant cui agns, o bandonarìn la sovrastrutture sociâl e antropologjiche che la societât nus veve imponude e o pandarìn veretâts platadis di nô stes, aspiets ch’o vevin cirût di soprimi o di tignî sot control.

Duncje, cence ridusi pre Checo a la vite di pre Checo, cence fermâsi dome a ce ch’al è stât, cirin di viodilu in azion fra di nô. O sai che al varès otante vot agns, ma ancje se vieli mi plâs inmagginâlu cun chê grinte che lu à cognossût.

Pre Checo predi

Pre Checo inte sô vision de glesie, isal ancjemò atuâl, isal valit o no? O rispuint a colp di sì.

Di fat, nuie dai siei principis teologjics seont me al è colât e ce che al predicjave ai siei timps al reste acetabil e vêr.

Al di là des sôs conferencis, o ripuarti a testimoniance de mê opinion un document scrit ancjemò al prin di novembar dal 1978, fieste dai sants; nol ven dal so penâl ma dai incuintris dal grop di predis di Glesie Furlane. Nô in chei timps o dipendevin de sô teologjie, de sô vision di glesie, de sô grande erudizion, de so opare sociâl e politiche pal ben dal Friûl.

Il document al dà la gjenuine clâf di leture di pre Checo in relazion a la glesie locâl e al varès di jessi ancje vuê il telâr di ogni programazion e azion pastorâl.

O ripuarti il toc de introduzion.

AI PREDIS DE NESTRE DIOCESI DI UDIN

“Fate sul tai di Crist (gr. symmorfos tō Cristō), la glesie no si à di ridusile dome a robe di chest mont, ma nancje dome di chel altri mont, come Crist che nol è dome om e nancje dome Diu ma misteriosamentri chel e chel. Cussì se si pratint che la glesie sicu robe di chest mont e sedi par dut compagne si finis cul dineâ la sô umanitàt ch’e je la nestre di umign difarents par storie, culture, mût di jessi e di vivi; d’altre part se si dinee il stes Signôr, la stesse fede e il stes Batisim (S. Pauli), si dinee ce che di chel altri mont e à intorsi e ch’al è identic par ducj.

Poben o sarin di une bande ducj de stesse glesie, ma di chê altre ognidun de sô. Al è par chel ch’a son nassudis tantis glesiis come ch’a son tancj i popui che te storie a àn vude une filusumie (al ven a stâi un cuarp) che ju disferenziave di chei altris: al è par chel ch’a son nassudis no dome lis diocesis (ridotis masse voltis a uficis di ordins dal alt) ma ancje patriarcjâts, sicu il nestri di Aquilee, cuntun cuarp tant propri, une filusumie tant sô di pratindi di jessi une glesie umanamentri difarente ancje di chê di Rome.

Nus e àn disfate, ma no àn rivât adore di disfâ chê nestre umanitàt che se veve fate e fate ben.

Pal moment no pratindin di rissussità nuie e nissun, ma nancje di lassâ pierdi chê umanitàt popolâr che une volte e à fat nassi une sô glesie e che cumò no si devi trascurâ se si ûl che la nestre religjon e sedi nestre, no resti foreste pal nestri popul e e finissi cul sgridelâsi ta chescj agns di savoltaments. La glesie di Crist par jessi in chest mont e scuen vê un popul che se cjape sù come il fi di Diu che par vignî in chest mont al è diventât ancje fi di Marie, un ebreo de tribù di Gjude: cussì la glesie chenti in Friûl no pò e scuen jessi furlane”.

Chest al è pre Checo predi e ce che lui al continuarès vuê a predicjâ dai pulpits e dai ambons des glesiis di Sapade fint a Gurize e a Pordenon; ce che lui al spiegarès intes scuelis, placis e ostariis. Cun cheste teologjie al frontarès, come i profetis dal Antîc Testament, lis istituzions e al condanarès une struture glesiastiche che no à mai vût il coragjo di fâ une sielte autentiche e clare par une glesie locâl in Friûl.

Dut chest no lu inventi jo e no pues jessi condanât se lu dîs; lu berlarès pre Checo e jo o fasaès pecjât a tasêlu e a no metilu par scrit.

Pre Checo al veve curât il Messâl furlan pal - An A - presentât ai undis di lui dal 1971 a Aquilee, il Messâl furlan pal - An B - publicât dal 1973 e il Messâl furlan pes domeniis e pes fiestis, - Agns A, B, C – stampât tal an 1977.

Ce disaressial vuê, a otantevot agns, savint che il Messâl roman par furlan tradusût di pre Antoni Beline al è blocât intai dicasteris di Rome cence motîf, cence dirits, cence dignitàt, dome ingredeât in sieltis di calcui politics dal dut forescj al nestri popul?

Ce disaressial a viodi la Bibie che, ancje se jentrade intes liturgjiis midiant dal Lezionari, no je Peraule incjarnade, studiade e meditate intai Cors di teologjie, di pastorâl e in Seminari? Cemût podarae la peraule di Diu diventâ, a chestis condizions, liberazion spirituâl, culturâl e politiche dal nestri popul?

Ce disaressial di cheste glesie peade mans e pîts, clonade des diretivis che a vegnin dal alt e che no rive a tornâ a nassi cjapant un cuarp gnûf intal agâr dai piçui paîs, de int libare e di buine volontât, dai tribulâts di vuê e dai Paris de glesie di Aquilee?

Mi fasin pore chestis domandis; mi metin inte tentazion di viodi un pre Checo strac, isolât, forzit ancje avilît, come se al ves lavorât dibant, sierât inte sô cjase, inte sô borgade di Bulons a Montenars.

Par chest o preferis cjalâlu inte mission che Jahvè i veve dadi a Gjeremie: “Atent! Propit vuê jo ti met parsore dai popui e parsore dai reams par dislidrisâ e par sdrumâ, par butâ jù e par fruçâ, par fâ su e par plantâ” (Gjer 1,10).

Pre Checo al jere chest! Al volarès un pre Checo vuê.

Autonomist

Nissun al dinee che in chescj agns a nivel regionâl e provinciâl no sedin stâts fats dai progrès intal sustignî la lenghe e la culture furlane, ma ancje ducj o restin dacuardi che identitât, autonomie, culture e lenghe a restin simpri intal pericol di jessi ridusudis a un optional o, adiriture, a un nuie di fat in non de unitât d'Italie e de italianitât; intal interes specific di une citât foreste: Trieste.

Cumò si cjacare in continuazion di federalismi fiscâl. Al è impuartant, però pre Checo nol partive dai bêçs ma de culture.

Dome l'identitât culturâl furlane e pò dâ al nestri popul une origjinalitât, une muse, un puest di dignitât tal mont globalizât.

E a proposit di culture, pre Checo nol acetarès di volê salvâ il furlan midiant dal talian. Cheste teorie e jere par lui une pseudoculture, une false erudizion, une borghesie inteletuâl e mi ricuardi benon che, cjacarant di chescj inteletuâi cence popul, ju rideve fûr e nol veve par lôr nissune remission.

Chest volê salvâ il furlan cul talian, in certs ambients al continue a sedi di mode ancje vuê.

Ricuardînsi di ce che al diseve il Mahatma Gandhi: che par salvâ une lenghe bisugnarès dâ ancje la vite. E l'autonomie di pre Checo e passave par cheste strade.

Pre Checo nol varès nancje aprovade une lenghe furlane ch'e ven dome dai studis dai specialiscj ma cence il savôr de fevelade de int.

Par lui il prin vocabolari al restave simpri il lengaç ancje de ultime borgade des vals e des monts.

Il vocabolari, chel altri, chel scrit, nol veve di jessi che un spielî rispjetôs e studiât di ce che il popul, vêr e prin autôr de peraule, cu la vite al proponeve.

No si pò partî dai libris par rivâ al popul, ma bisugne partî de int par incuadrâ i studis.

Un altri fat che pre Checo al varès ritignût di pseudoculture al è il continui tam tam mediatic sui problemas dai imigrâts.

Nol è che pre Checo al fos cuintri, parcè che ancje lui al veve fat l'emigrant fint in Argentine e parcè che ancje la nestre int subit dopo dal taramot dal 1976 e à scugnût partî dal propri paîs viers Lignan, Caorle, Bibion. In chei timps pre Checo al sustignive che i Furlans de Basse dai paîs restâts in pîts a varessin vût di viergi la parte par dâ un sotet a chei ch'a jerin restâts cence cjase.

Ce che in chês volte al diseve par nô, lu varès dit in cualchi maniere ancje vuê par chês personis che inte recession ch'e comence a deventaran plui puaris, si cjataran in dificoltàs economichis e cence dignitât.

In chei timps, se pre Checo le veve sù cun cualchidun, le veve cuintri ducj chei che cul apogjo dal governi talian a jerin vignûts a ocupâ i prins puescj intai nestris servizis publics, tai uficis e intes scuclis. Lui al sustignive che o sin in grât di governâsi di bessôi e se o vin di paîa i sbalgjos, che a sedin nestris e no di chei altris.

Al veve stime di nô, nus deve autonomie e dignitât.

Pre Checo le varès sù invezit cun chei che a tegnin i migrants in palme di man, a sostegnin i lôr dirits, lenghe e culture, a vulin salvâ lis tribùs e minorancis de Afriche e a ignorin o a spresein la nestre lenghe, culture, tiere e paîs.

E je une teorie di mode ancje vuê. Pre Sef Cjargnel, plevan di Guart, intun incuintri dal dopo taramot intal centri sociâl di Vençon al à definît cheste mode un "sottosviluppo culturale".

Pre Checo, semplicementri le sbeleave.

Pre Checo al veve l'autonomie intal sanc. Al jere fi di un paîs di grande dignitât ma metût in bande, fûr di man, circondât des monts e li che di di e di gnot si podeve cjalâ jù e dominâ dal alt in bas la planure; li che si podeve permetisi di lâ a cjapâ ucei cence licence o di lâ a cjace cui braconîrs.

Chel ch'al cognòs la int di Montenars, al capìs une vore ben che cun lôr sui dirits de autonomie no si scherze.

Pre Checo om

Al dîs l'autôr dal libri dal Qoelet:

“Ve, chest al è ce che o à cjatât, al à dit Qoelet, cirint il parcè di dut, robe par robe: ce ch’o cîr no lu à cjatât. Un om su mil o à cjatât.” Qo 7,27-28).

O pensi che cheste afermazion e puedi sedi aplicade a plen dirit a pre Checo Placerean.

O jeri zovin e pre Checo lu vevi za cualchi volte sintût e scoltât ma ce mi succedevial in chel 1973 che mi faseve cjavâ la strade di Montenars par presentâmi a lui e vê l’ocasion di cognossilu miôr?

Mi ricuardi che lu à cjatât intal curtîl de ostarie sentât insieme a altris oms tor di une taule e su la taule il bocâl dal vin. Lui mi à scuadrât e fat sentâ. Mi varà cjavât come un poleçut apene jessût dal gjalinâr, dal seminari.

In lui o cjavavi sore dut la libertât: libertât di pensâ, di frontâ, di dâ une opinion personâl cence pôre, di relativizâ cun inteligjence i dogmas e lis regulis de glesie, di vê une autonomie, di jessi se stes cence mai colâ in chê libertât tant propagandade de television di vuê ch’e je banalitat inte ignorance, stupiditât, sgionfate di egoisim e di nuie.

No savarès il motîf che in chei agns si son dâts dongje a pre Checo altris predis. Ducj, o pensi, o restavin colpîts de sô personalitât marcade, vive, profonde, sclete e di valôr. Si cjavavin cun lui chei che daspò o saressin diventâts Glesie Furlane: pre Antoni Beline, pre Erminio Cossaro, bons. Giovanni Della Bianca, pre Gjulio Ziraldo, pre Josef Cjargnel, pre Mario Del Negro, pre Maurizio Ridolfi, pre Pauli Varut, bons. Pieri Degani, pre Renzo Dentesan, pre Romano Michelot, pre Rinaldo Gerussi, pre Tonin Cjapelâr. Nô no jerin i unics: tancj, sore dut laics, a jerin chei che a gjoldevin de amicizie dal leader di Montenars.

Se cumò o volarès tornâlu a incuintrâ intun determinât moment, mi plasarès cjavâlu inte basiliche di Aquilee e sintîlu intune sô predicje. Li, sore dal pavement di Teodôr, di Valerian, di Cromazi, li che a vevin cjaminât Jeroni, Rufin, S. Ambrôs e S. Atanasi, lui si sintive patriarcje e profete, un Mosè che al guidave i Furlans intal grant passaç de sotanance di secui a la tiere promesse di une dignitât di oms.

Mi plasarès olmâlu fra lis maseriis dai paîs taramotâts o intes cunvignis dai comitâts fra lis barachis li che lui al rivave simpri in ritart e li che ducj o spietavin une sô peraule.

Mi plasarès jessi cun lui a S. Pieri di Cjargne par dîsi che ducj nô di Glesie Furlane o sin ancje vuê inte sô bressane.

Podessio tornâ a stâi dongje in cualchi moment dai ultims agns de sô vite, cuant che ormai, inte esperience de malatie, al veve pierdude la grinte de maturitât e la passion pai studis e al jere diventât debul e bisognôs di dut massime di une peraule e di un afiet come un frut.

In chê volte la sô umanitât e vaive, si lamentave, e pierdeve la sperance, e gemeve, si slontanave zornade dopo zornade de lûs e e des batais di chest mont.

Il pre Checo de maturitât mi à dât tant come mestri degn di chest non, ma mi inlumine ancjemò la sô muse segnade dal mâl. Se la sô sience mi fâs pensâ, se il so coragjo mi libere, se la sô teologjie ancjemò mi istruis, la sô condizion di malât mi mostre ce che al insegne il dolôr.

Cumò mi plâs viodilu intal rocul, il so rifugjo, la sô passion, il lûc de sô riflession e preiere personâl, de sô autonomie, dal so vivi cun se stes al di fûr di ducj e di dut.

Si lei intal libri dai Numars ai cjavitui 22-24 che Barak re di Moab al veve mandât a clamâ Balaam l’induvinin par che, cjalant jù di un çuc lis tendis di Israel, al ves a maludî chei beduins cence tiere e cence culture. Ma Balaam in chê ocasion nol rivà ni a cjalâ di brut ni a maludî, ma dome a benedî.

Forzit ancje pre Checo vuê dal so rocul al cjale jù come Balaam la plane dal Friûl par continuâ a benedî e a dâ coragjo a une int ch’e cjamine fra mil dificoltâts viers la tiere promesse de proprie dignitât spirituâl, culturâl e politiche.

Inte Bibie, Balaam al ven definît l' om "ch'al viôt in dentri, ch'al sint lis peraulis di Diu e ch'al cognòs la sience dal Altissim, ch'al viôt ce ch'al viôt chel ch'al pò dut e il vèl al sparìs dai siei vôi".

E je une laude ch'e pues semeâ esagjerade, fûr di puest par pre Checo, ma jo lu stimi cussì: come un Balaam predi, autonomist e om che dal rocul di Montenars al benedis ducj nô e il nestri Friûl.

pre Tonin Cjapelâr